

Gniježđenje kosca (*Crex crex*) na području Gojevića (opština Fojnica)

Breeding of the Corncrake (*Crex crex*) in the area of Gojevići (Fojnica district):

The first record of the Corncrake (*Crex crex*) in the village of Gojevići was in 2002. The number of individuals has increased over the recent years. In 2008 five singing males were recorded. On 21 August 2008 an immature Corncrake was found dead on the hill Dragoš, under Bijeli pijesak, and above Separacija.

Jedne vlažne i maglovite večeri u maju 2002. godine iz područja oko potoka koji je proticao na pedesetak metara od naselja Gojevići dopirao je prodoran zvuk pjesme kosca (*Crex crex*). Nakon izvjesnog vremena nastala je tišina i ispred mene je poletjela ptica. Za vrlo kratko vrijeme sa istog se mjesta ponovo počeo glasati kosac. Ovaj put su izletjele dvije ptice. Neobično, ptice uopšte nisu postale uznemirene, nego su bile pitomije. U 2003. prvi kosac je zapjevao 11. maja. Ove godine bile su tri ptice. Kosci su se zadržavali u vlažnoj ravnici, međutim, kad se trava u ravnici pokosila, povukli su se na brdo. Jedne ljetnje večeri pošao sam na brdo da istjeram jednog kosca na vidjelo. Bio je još dan, a on je već počeo pjevati, pa sam mislio da ga natjeram da poleti i da ga bolje pogledam. Tada sam vidio četiri kosca. Broj kosaca u Gojevićima se povećava svake godine otkako su se pojavili prvi put 2002. godine. U 2008. godini prvi kosac je zapjevao u noći sa 13. na 14. maj, a posljednji put sam ih čuo 14. jula. Na lokalitetu Gojevići ove godine sam zabilježio pet pjevajućih mužjaka. 21. 08. 2008. sam pronašao i konkretan dokaz o (ne)uspješnosti njihovog gniježđenja. Naime, pronašao sam mrtvog nedoraslog kosca na brdu Dragoš-ispod Bijelog pijeska i iznad separacije, na putu koji vodi do izletišta. Lijevo krilo mu je bilo slomljeno, a na desnom krilu mu je bio potrgan mišić. Imao je i ranu na prsima. Po potkožnom zračnom mjehuru na boku, zaključio sam da ima i oštećenu neku zračnu kesu u tijelu.

Damir Iviš

Ornitološko društvo „Naše ptice“, Semira Frašte 6, 71000 Sarajevo, naseptice@hotmail.com